

四庫全書

集部

欽定四庫全書

集部  
藏春集卷二

詳校官中書臣孫溶

主事臣呂雲棟覆勘

總校官編修臣王燕緒

校對官中書臣高 中

謄錄監生臣施 華

欽定四庫全書

集部五

藏春集

別集類四元

提要

臣等謹案藏春集六卷元劉秉忠撰秉忠有玉尺經已著錄秉忠博覽好學尤邃於易凡天文地理律歷三式六壬遁甲之屬無不精通故術數家言多托之以行世往往不可盡信至其所著文集見於本傳者十卷今此本

祇六卷乃明處州知府馬偉所刊前五卷為  
各體詩末一卷附錄誥勅誌文行狀而不及  
所著雜文故秉忠所上萬言書及其他奏疏  
見於本傳者概闕焉蓋文已佚而僅存其詩  
故卷目多寡與本傳不合也秉忠起自縉流  
身叅佐命與明道行蹤跡頗同然道行首搆  
逆謀獲罪名教而秉忠則乘時應運叅贊經  
綸以典章禮樂為先務卒開一代治平其人

品相去懸絕故所作大都平正通達無隳殺  
之音史稱其詩蕭散閒澹類其為人雖推之  
稍過然如小詩中鳴鳩喚住西山雨桑葉如  
雲麥始花之類亦未嘗不時露風致也乾隆  
四十六年四月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

藏春集原序

易曰觀乎天文以察時變觀乎人文以化成天下大哉  
文乎在天為日月之著明雲漢之昭回星辰之錯綜在  
人為三綱五常之道禮樂刑政之方典章法度之美文  
乎文乎章句云乎哉大傳文貞公學參天人思周變通  
早慕空寂脫棄世務一旦遭際聖主運應風雲契同魚  
水有若留侯規畫以興漢業召公相宅以營都邑叔孫  
奉常綿蕝以定朝儀陸賈詩書之語賈生仁義之說當

雲霾草昧之世天開地闢贊成文明之治其謚曰文不  
亦宜乎至於裁雲鏤月之章陽春白雪之曲在公乃為  
餘事公歿後十有四年是集始行於世夫人竇氏暨其  
子璋介翰林待制王之綱求為叙引晚生愚陋誠不足  
知公萬一姑以時論所同然者附諸編末云至元丁亥  
四月初吉翰林學士太中大夫知制誥同修國史閣復  
序



欽定四庫全書

藏春集卷一

七言律詩

溪山晚興

楚山臨水適幽情無意成詩詩自成  
秋雨滴殘秋草暗  
晚雲收盡晚風清  
漁舟散去橫烟靄  
樵擔歸來踏月明  
是樹有枝堪架足  
南飛烏鵲莫多驚

元 劉秉忠 撰

帳中

四旬已過五旬數髮際青絲間白絲萬慮困心成底事  
一閒安分在何時自知量小難禁酒人笑才疎強賦詩  
愜意數篇真可老採殘百草得靈芝

閒中

兩字功名千萬宰紅塵遮斷海西東碧梧直幹終棲鳳  
綠竹虛心盡化龍明處細曾推物理昧時都錯怨天公  
年來頗得閒中樂世路區區夢也慵

讀遺古詩

人沒詩存重與看芳馨死幹比芝蘭生前富貴雖由命  
身後文章足可觀蜀錦絲頭從此細巴歌韻脚自來寬  
未言雪曲無人和傳者幾希作者難

小齋

小齋香火結閒緣鐘鼎山林各自天世事省來都合道  
凡心消去不須禪一庭花發青春裏七字詩成白酒邊  
醉倒未嘗知早晚客來長怪日高眠

齋中

芝蘭玉樹映風前白石青泉翠靄邊  
照世聖經明似鏡通方古道直如絃  
立心無罔蓋當爾處事有成皆偶然  
求彼不如求在我一檠燈火對殘編

蝸舍閒適三首

今古無窮歲月流山林鼎篆自悠悠  
意還本分是為足事不自然難免憂  
奪得鳳池終犯手構成蝸舍且抽頭  
南窻盡日消閒在細聽莘公說四休

其二

畫戟朱門將相家  
山間一室息紛譁  
素飡得飽那思食  
薄酒消愁宛勝茶  
就裏靜為真受用  
倒頭閒是好生涯  
此身久置功名外  
萬戶封侯任被誇

其三

半世勞生天地間  
千金易得一安難  
庭前松菊成閒趣  
意外雲山得卧看  
光滿此宵逢好月  
香來何處有幽蘭  
橫琴消盡塵中慮  
一曲秋風對月彈

嘗雲芝茶

鐵色皺皮帶老霜含英咀美入詩腸  
舌根未得天真味鼻觀先通聖妙香  
海上精華難品第江南葉木屬尋常  
待將膚湊浸微汗毛骨生風六月涼

試高麗茶

含味芳英久始真咀迴微澀得甘津  
翠成海上三峯秀奪得江南百苑春  
香襲芝蘭開竅氣清揮冰雪爽精神  
平生塵慮消融後餘韻駸駸正可人

江邊晚望

沙白江青返照紅  
滄波老樹動秋風  
天光與水渾相似  
山面如人了不同  
千古周郎餘事業  
一時曹操漫英雄  
東南幾許繁華地  
長在元戎指畫中

醉後

清明天氣賞花時  
桃李風前酒一卮  
夢獨不成春草句  
閒多記得古人詩  
倦將碎事然心火  
笑被虛名惱鬢絲  
惟有醉鄉同大化  
從他物理自參差

讀諸葛傳

賢聖隨時出處同道存元不計窮通一番天地鴻蒙後  
千載君臣草昧中玄德必咨當世事孔明良有古人風  
長才自獻成何用三顧還酬莫大功

讀書

畫餅功名抵死圖何如閒裏得看書衣冠三代凋零後  
經傳一秦灰燼餘梧葉打窗秋院靜松梢轉月夜窗虛  
又開黃卷青燈下坐進人間駟馬車



醉中作

年年策馬走風埃  
鐘鼎山林事兩乖  
千古興亡歸恍惚  
一身行止賴編排  
無才濟世當緘口  
有酒盈樽且放懷  
何日還山尋舊隱  
瘦筇偏稱著芒鞋

秋懷

昨夜西風撼綠荷  
芙蓉凋盡奈秋何  
歸心又落賓鴻後  
別夢還隨夜雨多  
客氣有時難制伏  
官身無事亦蹉跎  
近來只賴杯中物  
醉到半酣方浩歌

堤畔二首

金沙堤畔柳絲垂，燕往鶯還蜂蝶隨。  
爛漫一春花發早，飄零萬里鴈歸遲。  
閒來於物少相礙，行處與時多背馳。  
幾樹野桃開未了，東風無力賴誰吹。

穿林步水陟崔嵬，塞北雲南轉一迴。  
詩句漫隨秋色澹，夢魂長被鼓聲催。  
蝸房小小權書舍，馬厠清清當酒杯。  
門外衆人忙似火，几前孤坐冷如灰。

夢覺偶成

秋菊春蘭醉眼中紛紛紅碧不堪窮鄭玄李白從玄白  
馬異盧同果異同豈有功名歸豎子枉將文字困英雄  
鳥聲喚覺南窗夢撲簌槐花墮晚風

嶺北道中

雨霽輕烟鎖翠嵐五更殘月照征驂王戈定指何方去  
天意仍教我輩參霸氣堂堂在西北長庚朗朗照東南  
江山如舊年年換誰把功名入笑談

行中

一夜輕霜塞草愁關山慘淡又成秋西飛白日難繩繫  
東去黃河海自收節序催人無處避生涯隨分不須求  
長歌短詠行程裏心逸能忙百事休

慚愧

紫庭仙客駕飛鸞多少雲霄著眼看情節琴書於世澹  
元龍湖海為誰寬小詩吟罷仍須和長缺歸來不必彈  
門外黃塵數千丈窮廬慚愧一年安

守常二首

得失紛紛不必窮一鳴一息古今同韓侯假印元無命  
李廣祈封未有功世事百年魂夢裏人生幾日笑談中  
朝三暮四相狙戲識破從前賦芋翁

熏天富貴等浮雲流水年光夢裏身但著眼觀皆外物  
不開口笑是癡人歌臺買酒閒消日醉帽簪花老弄春  
燕燕鶯鶯莫相戲渠應未識此心真

論交

山前春色夢中殘鏡裏秋霜鬢際繁處世羨人能辦事

論交愧我未忘言蒼梧雲氣時時變赤壁波濤日日翻  
誰解立心如砥柱百湍衝激只依元

春晚還山

人生無計免風埃漠北江南鴈往來萬木何曾秋未老  
百花爭向煖俱開未能乞食尋歌院要想遊山到嘯臺  
明月滿庭閒杖履翠烟惹徧綠紋苔

秋夜

讀詩懷古掩重扃上世淳風在典刑儀鳳作歌猶有道

感麟絕筆再無經明星墮地曾為石腐草逢秋也化螢  
殿閣參橫月斜落夜寒書舍一燈青

山家

翠微深崦遯肥家占斷安閒閱物華不但愛詩仍愛酒  
何妨栽竹更栽花固知天命元無間還信人生各有涯  
華屋山丘都是夢且圖沈醉卧烟霞

春閒遣興

自任張衡說四愁不令一點上眉頭是非海裏有何論

名利場中無所求  
掃睡擬將茶作帚  
釣詩須著酒為鉤  
春風吹綠山前草  
盡日攜壺勝處遊

閒况四首

車馬長安蕩路塵  
商山一曲紫芝新  
林泉誰伴隱君子  
雲月自歸閒主人  
蝴蝶日長莊叟夢  
鴛鴦沙暖杜陵春  
汨羅江上獨醒客  
空感秋風撼白蘋

一理未明常曖昧  
七情能節自冲和  
孟軻求已行時簡  
顏子齋心樂處多  
脩禊水邊羣客會  
舞雩風裏一僧歌



沙汀日煖春烟澹無數閒鷗沒浩波

閒中日月讀書舍醉裏乾坤沽酒樓金滿千巖遺子惠  
官高一品替人愁於身道理行須記隨分生涯過即休  
看取飄飄無繫纜烟波江上一虛舟

山有嵐光水有聲得閒便是大功名彼長然覺此為短  
我聖未知人所輕幾樹好花風乍靜一鉤新月雨初晴  
此心只合長無事莫為人間寵辱驚

秋夜飲

葉打銀牀謝井梧  
芰荷池沼半成枯  
青山阻興長千里  
白酒消愁只一壺  
日暮西風吹過鴈  
夜涼明月照驚烏  
黃花離落秋香裏  
醉倒淵明不要扶

自然

名利場中散誕仙  
只將吟樂度流年  
酒逢知己心方醉  
詩到收功意更圓  
碧水悠悠入東海  
白雲曳曳上賓天  
但能直往無凝滯  
不自然時也自然

漫興

春風吹入客中懷，滯氣愁眉總散開。  
誰暮蘭馨將作珮，自慚樗散不成材。  
詩吟百首興猶在，酒飲兩杯春已來。  
累土豈如平地穩，當年浪築九層臺。

醒來

尺蠖微蟲解屈伸，人生何用兩眉顰。  
前前後後都為夢，是是非非總未真。  
已幸有書消永日，豈堪無酒度芳春。  
東風院落花梢上，午醉醒來月色新。

客散

南山秋色氣相高肥馬輕裘盡俊豪  
載笑載歌誰得意相趨相奉總成勞  
塗中易曳靈龜尾池上難尋彩鳳毛  
自覺不堪仍不可嵇康未欲絕山濤

別張平章仲一

四旬未老頭先白可笑區區紙上名  
張翰且休歸故里謝安應不負蒼生  
窮通此際難開口離合中年易動情  
恨殺溪流與山色天南地北送人行

吟詩

七情荒逸難追雅六義綸紛始到騷句穩先須辨長短  
字工端要定推敲言非精當功應少意不包含氣漫高  
出手若能圓似彈千迴萬轉任吟嘲

有感

大道荒蕪沒草萊一回翹首一回哀論文須謂可方可  
言志豈拘才不才美錦幾時無善製好花隨季有新開  
風人托物成騷雅未必初心在物來

適意

靜裏乾坤醉裏仙  
閒愁不到兩眉邊  
堂中立足有餘地  
井裏舉頭無大天  
淺酌酒杯消永日  
細開書卷度流年  
霸陵橋下長安道  
自在諸公鬪著鞭

自平

輸情盡意尚難行  
專利如何不致爭  
未解塞將他意滿  
但宜持得自心平  
溪聲遠作千年調  
山色高移萬古情  
自向書中識天爵  
已當克處漸能輕

對鏡

鏡中人向鏡邊羞有底功名早白頭識字豈知為物忌  
讀書空想解民憂星疎月朗元非晝老木蒼波宛是秋  
千古五湖高興在秋風不管未歸舟

適情

鵲喜舉枝鶴啄苔能閒能宦各天才北山逋客攜琴去  
南壠幽人策杖來莫看鳳鸞棲枳棘任他斥鷃笑蒿萊  
據牀三弄桓伊笛豈愧孫登有嘯臺

自勉

鏡裏流年髮漸皤殷勤學道莫蹉跎黃金斷要經燒煉  
白壁元曾受琢磨能自處心終始一任他開口是非多  
當如織女機頭錦每日須教進幾梭

接輿狂歌

唐虞風化尚真純天壤熙熙萬物春三代盛時存此道  
六經今日付何人狂歌楚叟能知鳳絕筆宣尼自感麟  
滄海波光泰山色漫勞平地赴纖塵

秋感



流光漸漸日相拋  
鏡裏班班見二毛  
世事短長量不定  
人生趨舍哂徒勞  
鴈翻夜月還三楚  
鶴駕秋風唳九臯  
獨有紫庭閒散客  
碧雲哦罷讀離騷

寡合

平生寡合嬾拘牽  
獨自看雲獨自眠  
伐木友逢多齟齬  
散花人至短因緣  
長教身類沾泥絮  
贏得心如出水蓮  
詩卷兩牛拖不動  
囊中那有一文錢

不同

高樓百尺卧元龍問舍求田那得同孟子臧倉譏禮義  
使君曹操識英雄鷦鷯不過一枝木騏驎更追千里風  
莫向華山陳老說睡魂不在是非中

古今

道存南北馬牛風古往今來了不同彼在古時諸事遂  
我生今日百憂逢趙高漫指鹿為馬李賀不羞蛇作龍  
太華山前一樽酒放開醉眼看蓮峰

憑高

憑高四顧入無窮萬物云云見此容世事鹽雞深甕裏  
人身稊米太倉中漫漫流地海無岸落落倚空山有峰  
一箇肚皮都著了更教誰去號天公

觀豪

富貴繁華得幾秋生存華屋老山丘謝安攜妓東山醉  
李白騎鯨北海遊水吟魚龍俱漠漠天長魚鴈亦悠悠  
求田問舍麓踈倒慚愧陳家百尺樓

對酒

浮世人稀七十強憂愁朝夕半相妨騷中不奈靈均苦  
酒裏從教太白狂歌後清聲自嘹唳舞來長袖任郎當  
任將世務閒拘檢杯卷東風醉一場

西蕃道中

鞍馬生平四遠遊又經絕域入蠻陬荒寒風土人皆愴  
險惡關山鳥亦愁天地春秋幾蒼鴈江湖今古一扁舟  
功名到底花梢露何事區區不自由

烏蠻道中

稠林夾路冠依違彪騎單行壓衆威重勸小心防暗箭  
深知老將識兵機風號日落江聲遠山鎖寒烟樹葉稀  
鸚鵡喧啾似鴉雀百千都作一羣飛

烏蠻

華夷圖始豈虛傳經過分明在目前日月照開諸國土  
乾坤包著幾山川曾聞仙闕多官府足信人寰有洞天  
萬木歲寒青不落喬松古栢想長年

過白蠻

脊背滄江面對山兵踰北險更無難投亡置死雖能勝  
履薄臨深未敢安赳赳一夫當入路蕭蕭萬馬倒征鞍  
已升虛邑如平地應下諸蠻似激湍

南詔

半生鞍馬苦勞形鬢影難求曉鏡青萬里又征南詔國  
九霄還識老人星直將日月銷書帙更假雲山作畫屏  
滿地干戈雖有酒不能長醉似劉伶

下南詔

天王號令迅如雷  
百里長城四合圍  
龍尾關前兒作戲  
虎賁陣上象驚威  
開疆弧矢無人敵  
空壁蠻酋何處歸  
南詔江山皆我有  
新民日月再光輝

滅高國主

事君忠義子孫優  
莽操源泉得遠流  
折足鼎空公餓覆  
剖心人若鬼魂讐  
青山不管廢興事  
白酒可消今古愁  
願戢干戈息征伐  
歸期先卜兩眉頭

滿坦北邊

神機恍惚統鴉兵韜畧閒文宣足憑風急旌旗高捲日  
夜長刁斗寂無聲陣雲垂作中軍幕螢火點成元夜燈  
萬里封侯男子事定誰唾手取功名

九日滿坦山

凌雲氣節鬢驚秋書劍荒寒事遠遊萬里嵐光乘馬背  
一川紅葉上鰲頭西風不管叅軍帽絕塞空凋季子裘  
誰把茱萸念行役憑高拭目望神州

驢湫道中



烹水凝泥踏有聲  
北風摧發更南征  
一旗颭颭山邊過  
萬里彭彭鼓上行  
幾復回頭迷故國  
再堪屈指數前程  
鳳凰望斷麒麟絕  
空想簫韶奏太平

玷食山前

陰雲濃淡水洄環  
颭颭旌旗濕未乾  
慣熟人情生處樂  
崎嶇世路古來難  
一川野草霜前死  
萬樹西風雨後寒  
遙想家園未搖落  
不能容易報平安

烏蠻江上

一泓碧玉垂天影萬丈丹梯壯地形世路不能平險阻  
人生還得免飄零月娥無語照吟坐河伯有聲呼醉醒  
明日烏蠻屬行役又攀參角上青冥

江上寄別

軍中無酒慰飄零辜負沙頭雙玉瓶鞍馬幾年南北路  
關河千古短長亭好風到枕客愁破殘月入簾歸夢醒  
夢斷故山人不見曉來江上數峰青

江邊梅樹

江邊繚繞惜芳叢絕筆天真在眼中素艷乍開珠蔭蕾  
暗香微度玉玲瓏一枝倒影斜斜月滿樹浮光細細風  
明日行經山下路幾回特地駐青驄

過梅戶

龍角東昂斗柄迴春風無恙遠人歸干戈絕擾程程酒  
景色堪憐戶戶梅鷗波寒渾懶戲鴛鴦沙暖不驚飛  
青雲出岫緣何事馬上詩成雨莫催

過玲瓏山

世外徒聞說洞天桃源迷路再無緣  
摩青硯磊誰能鑿  
繡白玲瓏自可穿  
別有一壺藏日月正看萬竅吐雲烟  
勞生得遇崆峒客煉訣還丹問隱仙

山寺

樓花堆白麥苗青山寺南頭  
帳玉停流水縱橫成篆字  
遠山前後簇圍屏  
漢唐浩瀚開疆土  
蠻貊依稀在典刑  
士庶何曾避戎馬  
總知仁主惜生靈

峽西

鱗層竹屋倚巖阿是歲秋成粳稻多遠障屏橫開戶牖  
細泉磴引上坡陀民人各得安家住辭氣總如平日和  
簞食壺漿迎馬首湯征元不弄干戈

雲南北谷

征輦震作旅魂驚直入雲南谷口行一水循環通地脉  
四山連避壯天城兵還失律難依險國旣無人立可平  
馬援班師銅柱在誰知兒戲得功名

鶴州南川

閒情平日愜林丘不憶南來得此遊  
遠近樹分山障列縱橫水入稻畦流  
一川風物撩詩興滿地干戈破客愁  
回首斜陽在喬木獨憐幽境更遲留

過鶴州

千山險阻此川平未審州何鶴得名  
綠水泗環澆萬壠黃塵隱約認孤城  
田疇傍舍存恒產兵火誰家得樂生  
伐罪令行元不殺遠蠻歸服感仁聲

春間

儘向青霄駕彩鸞  
鷓鴣先得一枝安  
詩書况味閒偏得  
歌酒情懷醉愈寬  
時雨荒山添潤澤  
春風野水動波瀾  
玄都觀裏桃花放  
應待劉郎醒後看

閒淡

閒淡功成百事休  
秋風生計任蕭颼  
客攜酒至須轟飲  
人寄詩來愧懶酬  
碌碌無才甘自滯  
棲棲有道果誰求  
平途款段猶多蹶  
歷愧輸他紫燕騮

秋懷

梧桐殘翠落成堆  
燕去鴻來秋社催  
刺眼不須翻著襪  
放懷且好持杯空  
堦寒雨滴愁盡  
高枕曉風吹夢回  
咫尺登高是重九  
黃花更酌醉金壘

秋夜有感

竹影斜斜轉月輝  
西風颯颯透征衣  
菊殘愛菊人空感  
家遠思家客未歸  
戰馬頻嘶秋正健  
驚鳥無睡夜猶飛  
幾時一榻南窗下  
不見黃塵老翠微

藏春集卷一



欽定四庫全書

藏春集卷二

元 劉秉忠 撰

七言律詩

夏日遣懷

拏雲心事倚樓邊  
鏡髮星星過少年  
學步誰知翻失故  
效顰自笑不成妍  
詩章騷雅唐新變  
字體風流晉舊傳  
吟寫總為閒伎倆  
且將消遣日長天

客中

人間機事細如麻，落魄身心到處家。  
無帚掃清堂下地，有書遮靜眼前花。  
兩杯粉潑貓頭筍，一碗酥烹雀舌茶。  
只此一朝公事畢，焚香高枕卧烟霞。

將歸見鴈

一別沙陀白帳房，數朝棲止李君堂。  
轉逢世路身渾懶，趁食人間口尚忙。  
百變浮雲諳世態，千迴流水轉年光。  
山城欲問春消息，淡淡長空見鴈行。

西州客中

蕙帳空閒客塞城猿驚鶴怨可憐生  
風雲遠際千年會  
天地中含萬古情  
總指青山作歸計  
直將白髮換虛名  
向誰得遂求田意  
樓上元龍氣未平

黃河

萬仞崑崙頂上頭  
頽然委質下林丘  
九隨地勢曲千里  
一返天源經百州  
磧石西邊才北轉  
太行南下已東流  
黃勻一線穿滄海  
直接銀河浸斗牛

冬夜飲南京酒

煨開琥珀明黃色散作薔薇軟細香歡伯情懷渾易見  
麴生風味實難忘一尊儘可消塵慮萬事何能到醉鄉  
盡道三冬無煖氣誰知春色此中藏

答崔夢臣

青春去卻再難尋白髮還從鬢際侵顧我百年成幾事  
得人一語勝千金佳賓久望孫弘閣早稼專祈傳說霖  
此意朱弦但聊復不能聲處有知音

寄馮世昌三首

大中為體用時中酌古宜今道可通臨事若私先有礙  
立心非正後無功在天何問但存義進我無疑當效忠  
有所不行須自反爭如桃李待春風

心差利害一毫間誰肯尋思擴四端人事要於多裏煉  
物情宜向靜中觀止時休恨窠巢窄行處須開路徑寬  
天道好還冬對夏為仁由己意非難

君子隨時出處同廟堂籌畫馭英雄文經武緯通今古

玉振金聲貫始終  
葛亮岡頭千壠月  
嚴陵波上一絲風  
自從兩漢分三國  
青史書誰第一功

呈全一庵主

百結千圍繫物繩  
古根金種未忘情  
莊周一夢花間蝶  
圓澤三生石上僧  
詩有仙風拋世網  
酒藏奇計破愁城  
放他少室山頭月  
代祖流傳不盡燈

呈南庵友人

一篋詩書三尺琴  
忘懷鐘鼎是山林  
聖賢處世常存道

男子遭時始見心  
嗅殺芳蘭無惡氣  
聽殘流水只清音  
虛名肉味從來薄  
況復聞韶歲月深

春日效宮體二首

雨洗芳塵絕點埃  
桃花零落海棠開  
沈香亭小圍紅樹  
太液池清映綠苔  
夜月也曾懸漢殿  
朝雲何只在陽臺  
六宮簾捲東風軟  
一派仙音翠輦來

婀娜腰肢窈窕娘  
雲鬟十八鬪新粧  
曾憐歌舞留香閣  
乍學笙簫入洞房  
禁苑春來花競放  
閒堦雨霽燕爭忙

長生殿裏明皇醉夢斷華胥白日長

看書

香焚銅鼎翠烟盤無意安心卻自安一語終身莫能踐  
九經盡日若為看流行似水那云易習慣如天不覺難  
大地含章秉元氣木生松栢草芝蘭

習字

硯水冰清墨細研紫毫深蘸拭華箋始從大裏收來小  
復自方中畫作圓鋒隱豹眠千嶂霧勢雄龍躍九重天



鸞飛鳳立難窮變要把王顏得處傳

和林道中

扶桑日曉雨初收襟袖涼生六月秋兩壁雲山夾行客  
一川烟草看飛驒玄車軋軋長轟耳白帳連連不斷頭  
宮闕上橫龍虎氣和林遙見帝王州

禁中

帳中書帙案頭存大禁炎炎不出門難為蒼生濟饑渴  
漫搜詩句廢晨昏銜珠報德成勞想衣錦還鄉莫浪論

時止時行吾不强笑他楚些作招魂

蜀先主孔明

智涉圖深往事非茅廬一論定真依風雲龍虎隨時有  
魚水君臣自古稀月照錦江翻夜色烟波玉壘動朝暉  
精英不死青天上留得文昌奉紫微

跋李太白舟中醉卧圖

仙籍標名世不收錦袍當在酒家樓水天上下兩輪月  
吳越經過一葉舟壺內乾坤無晝夜江邊花草自春秋

浮雲能蔽長安日萬事紛紛一醉休

跋太白醉歸圖

五斗先生未解醒一生愛酒不曾醒人間詞翰傳名字  
天上星辰萃性靈鴈帶煖回波泛綠燕銜春至草抽青  
紗巾醉岸南山道幾處哦詩補畫屏

太白還山圖

一片靈臺照世明共傳太白是元精心中有道時時樂  
眼底無塵物物清千首未知詩作癖百杯尋與酒為盟

長安多少風和月不盡先生吟醉情

孤雲

觸石初興一寸微漸張鵬翼赴天池無心出岫何憂累  
有象懸空不礙飛斜日只期風送遠枯苗還怪雨來遲  
曾同李愿棲盤谷應是從龍忘了歸

仙客

骨青髓綠紫霞腮玉府真游出世才眼裏方瞳萃神秀  
曾中明鏡絕塵埃風生嵩嶽三花樹月浸瑤池七寶臺

夜半朝元初飲散  
醉飛星馭到蓬萊

憶翦頭王先生

玉京金闕五雲間  
月滿瓊樓十二欄  
仙子已隨鸞馭去  
世人空想鶴書還  
喚回石上三生夢  
燒盡爐中九轉丹  
別後幽懷渺何許  
悵然滄海隔蓬山

憶竇侍講先生

煖到沙陀雪已殘  
春光猶惜照衣冠  
旋酬世事心渾懶  
不見幽人眼益寒  
明月只於圓處缺  
佳期常向易中難

相思一日三千里欲學忘情自未安

途中寄張平章仲二

觸熱從軍數載還高家書記到何官道存賢聖行藏裏  
人在乾坤動靜間為善不圖垂報遠濟時寧長涉艱難  
惟君曾次明如鏡照我區區兩鬢班

呈焦尚書仲益

道義猶難輔友生可將名字競時名為人當有往還理  
所事豈無憎愛情基上高低誰計較鏡中妍醜自分明

泰山多少閒堆阜滄海漫漫一望平

寄津長老

雲溪側畔竹林邊未塞平生未了緣  
詩裏久懷方外士酒前猶伴飲中仙  
真經縱暇開金卷難字還慵檢玉篇

師許傳韻  
法故及之

槐火石泉烹雪蘂阿師此夢共誰圓

憶顏仲復

滿座春風笑語生客中長記在家情  
赤心豈沒新朋友白髮難忘舊弟兄  
夜雨正令人百感秋窻忽放月孤明

禪房花木通幽處水遠山長夢不成

歲暮有懷寄仲脩宗舊三首

歲暮嚴風曉夜寒老烟蒼色滿關山  
騷人思和陽春曲  
遷客賡歌行路難美酒欲期千日醉  
浮生誰得百年閒  
揚州解舍週遭樹清淡梅花也屬官

歲寒親友淡相陪助發詩程舉兩杯  
情與古人千里合  
夢隨隣笛一聲回  
虛心立節霜秋竹  
瘦影橫窻月夜梅  
天意漸隨人莫測  
龍蛇飛動待春雷



蹤跡飄零事願違  
生平親舊總披離  
同人憂樂猶難易  
與世浮沈果是非  
寒雪自應隨臘盡  
菁莪何恨得春遲  
玉京一望漫於海  
安得超然控鶴飛

送鄉僧

中年懷抱要寬和  
故友依依奈別何  
夢到家來殊不遠  
情隨人去更還多  
龍岡雪盡回春色  
鴛水冰開漾月波  
若遇相知問蹤跡  
窮廬近日到沙陀

寄友人四首

閒裏詩書慰寂寥  
低垂絳帳謝塵囂  
心如秋月十分朗  
病逐春冰一向消  
陋巷顏淵貧有樂  
安車子貢富無驕  
更看萬丈頽波裏  
砥柱巍巍不動搖

親朋離闊往還稀  
十載天邊一鴈飛  
北闕書人俱自獻  
南山詩客與誰歸  
碧雲望久不成興  
青障夢殘還又非  
明日桃花如爛錦  
且須攜酒賞春輝

悠悠離闊感中年  
我輩情鍾豈不然  
好景與時渾易過  
可人和月只難圓  
五更殘夢雞聲裏  
千里歸心鴈影前

漠北雲南空浪走今春又負杏花天

香滿檀心雪滿枝梨花開近海棠時隴西鸚鵡藏金翟  
海底珊瑚絞鐵絲勁畫快心觀晉字清光在眼讀唐詩  
功名富貴非吾事惟有幽人是所思

答友人留飲

黃塵道路競拋梭不覺行年四十過世事逾多逾瑣細  
人生漸老漸蹉跎愁城平卻無遺址樂府開來有妙歌  
桃李花間一壺酒君留不醉欲如何

會故人小飲

俗事長將樂事違  
小園今日偶成期  
喜君落筆題詩就  
笑我停杯吸酒遲  
柳葉已將春雨展  
桃花猶待曉風吹  
倚欄紅杏低無語  
應為勞心蝶不知

勸友人酒

西風落葉共蕭颼  
百感中來不自由  
豪客空攜鐵如意  
舞鬟徒費錦纏頭  
曳過雨脚雲歸岫  
湧出山頭月滿樓  
一曲清歌一杯酒  
為君洗盡古今愁

為友人解嘲

德益休休偽益勞泰山不重亦毫毛  
九成豈脫試金石一割難同切玉刀  
繫日繩頭宜自頌擎雲手段任他高  
元龍骨化墳中土誰是中州第一豪

孤懷

孤懷嬾與世浮沈哀樂中年白髮侵  
射隼高墉猶可待亡羊多路定難尋  
鏡明惟解照人面尺曲不能量我心  
流水高山無盡意伯牙指下有知音

客興

關河牢落別離中到處題詩記轉蓬  
啼鳥不知春是客落花還逐水流東  
雲開千里遠山碧樓映半溪殘照紅  
雌蝶雄蜂不同類雙雙相趁舞迴風

讀韓信傳

將將將兵各有權基家一著要爭先  
依平得路猶難保弄險成功豈易全  
破趙有謀都一日假齊無分僅三年  
良弓高鳥俱塵土贏得英雄一惘然

再讀杜詩

規矩方圓稱物施  
運斤風度見工師  
干霄氣象動高興  
際海波濤生遠思  
三月聞韶忘肉味  
幾年疑郢和巴詞  
騷人盡在清光裏  
恰似中秋月滿時

讀山谷詩

清竒雅淡破工夫  
句句冰霜字字珠  
並舉鴻方上霄漢  
相忘魚已得江湖  
筆頭應有神靈助  
言外全無翰墨拘  
酒醒夢回秋氣爽  
似看明月在蓬壺

讀梁甫吟

調高辭雅動知音聲寂名存意愈深千載有聞諸葛語  
三人無愧晏公心稱賢未必皆能肖古何嘗不在今  
荷得鋤歸茅屋底一篇梁甫更誰吟

秋江漁父圖

白蘋紅蓼滿滄洲江上青峰倒玉樓出沒不拘同水鴨  
往來無繫伴沙鷗烟波圍繞幾漁舍天地橫斜一釣舟  
蓑笠為渠相蓋管瀟瀟風雨不勝秋



秋江晚景圖

落筆縱橫不自休，抹成小景絕清幽。  
碧波千里楚山晚，紅葉一林荆樹秋。  
古渡任分南北岸，長棹自送往來舟。  
十年間事漫如昨，對此依稀復舊遊。

竹林七賢圖

螳螂怒臂大車前，禮樂蕭條幾百年。  
蘭省久無三老貴，竹林徒有七人賢。  
忘形到底為形累，嗜酒尋常被酒顛。  
何似公何月臺上一聲長嘯裂秋烟。

宋漢臣墨梅

體盡江村雅淡情  
映來紙上照人清  
枝梢欲向風中動  
根幹原從筆下生  
幾簇芳英雪粧點  
一彎新月玉斜橫  
花光不死西湖見  
也索驚嗟問姓名

梨花

玉骨冰姿映曉光  
露盈檀蕊洗新粧  
天桃豔杏果誰賞  
雌蝶雄蜂空自忙  
仙桂是高寧有種  
海棠雖美卻無香  
司花護惜花長好  
莫遣東風取次狂

竹

幾竿蒼翠抵千金對鼓焦桐意更深雙淚洒時勻作點  
七賢居處密成陰飛霜著葉不改色流水漱根還有音  
我似此君君似我枝枝節節本無心

竹筍

亭亭瘦玉倚疎籬日夕摩挲恐長遲立節未能森似束  
出頭休若銳如錐共言愛物終成癖不道忘情卻近癡  
料得此君霜雪後虛心定有子猷知

月中桂

丹皮翠葉實花鮮  
深固靈根不記年  
老穎共為天上物  
嫦娥同有月中緣  
蓬萊山裏紅瑤草  
太華峰頭白玉蓮  
安得移來都一處  
醉看光彩照詩仙

秋齋

蕭蕭落葉打窻櫺  
夢覺幽齋熟睡僧  
萬里西風揚鷺鳥  
半窻烘日聚癡蠅  
物華老盡只秋健  
天運斡迴非力能  
且倒芳尊煖和氣  
門前物態冷如冰

太清宮

一簪鶴髮瑩童顏  
喬木森森古殿寒  
自駕白雲還帝闕  
不傳紫氣映函關  
五千道德留真誥  
八百工夫鍊大丹  
地老天荒無覓處  
猶龍那復落人間

因張平章就對東坡海棠詩二首遂賦一首

一種奇花號海棠  
十分顏色豈須香  
雨中有淚真傾國  
月下無言更斷腸  
不待金盤薦華屋  
高燒銀燭照紅粧  
少陵避諱將佳句  
留與眉山蘇二郎

因宋義甫宿香山寺

摩空削出碧芙蓉  
繾綣香山一帶峰  
野樹去年曾繫馬  
閒雲今日復從龍  
玉鉤三寸月沈水  
琴調數聲風入松  
清徹夢魂眠不得  
覺來那假曉樓鐘

秋晚同友僧宿潞南山寺

集林倦鳥已成棲  
石磴連沙澀馬蹄  
晚寺共攜明月入  
寒巖誰聽雪猿啼  
愁行十里九盤路  
夢斷五更三唱雞  
聲利不關陶靖節  
黃花零落醉如泥

宿山寺

是非不到石壇邊  
物外閒人第二仙  
赤羽林梢映斜日  
白虹山半駕飛泉  
客來總是尋僧話  
猿去多應伴鶴眠  
一曲清歌古松下  
且依勝境謝塵緣

聞宋義甫對竹引

高情遠韻無凝滯  
發作聲音指下彈  
玉調未曾終一曲  
朱絃何故疊三歎  
優游似道虛心易  
感慨如筠立節難  
昨夜綠筠亭上醉  
正同風雨夢珊珊

宋義甫彈秋風

穹廬悄悄夜漫漫  
午醉醒來坐席寒  
富貴有媒皆豹變  
功名無分獨螭蟠  
子陵實愧三公爵  
靖節非輕一縣官  
高捲瓊簾對明月  
秋風一曲入琴彈

戲宋義甫

香飄庭院牡丹妍  
荷貼池塘小翠圓  
生物不知春有老  
照人還愛月無偏  
黃塵道路嗟游子  
紫陌煙光誤少年  
欲著儒冠替僧帽  
而今直得幾文錢



佳人

錦心繡口性蕭閒學海波瀾挹不乾奇語八篇傳欲滿  
陽春一曲和皆難佩蘭襲襲生風韻懷玉溫溫辟雪寒  
別後佳人渺何許倚樓空詠碧雲端

宿中山乾明寺

客散關門厭事譁爐香滿屋卧煙霞人辭故里凡三載  
僧到伽藍自一家夢破小窻浮月色漏殘寒角奏梅花  
天明又上潯陽道鴛水歸程漸有涯

過居庸關

車箱來往若流泉絕壁巉岩倚翠烟限破中州四十里  
鑿開大路幾千年函關不謂平如地蜀道無知險似天  
萬里揮鞭猶咫尺誰能掌上保幽燕

過也乎嶺

一夜陰雲風鼓開嶺頭凝望動吟懷烟分雪阜相高下  
日出羶車競往來天定更無人可勝智衰還有力能排  
中原保鄣長安道西北天高控九垓

雞鳴山

俯瞰灤陽小洛城一川山色萬家屏翠環有第雲初合  
碧玉無瑕雨乍晴岩穴直通天地氣峰巒平揖斗牛星  
野僧不管人間事卧聽洋河聒耳聲

桓撫道中

老烟蒼色北風寒驛馬趨程不敢閒一寸丹心塵土裏  
兩年塵迹撫桓間曉看太白配殘月暮送孤雲還故山  
要趁新春賀正去鬚頭能不愧朝班

桓州寄鄉中友人

青山四合路縱橫解轡烏桓古塞城五載轉蓬離故地  
幾時促席話平生停雲靄靄落春雪明月輝輝開晚晴  
適意寧無一罇酒渴塵難洗為誰傾

大磧

漫川沙石地枯乾入夏無青雨露慳人馬數程饑渴裏  
風程一月往還間側橫鰲背登高地淡掃蛾眉見遠山  
安得司春生物訣桑田也似海東灣

秋日途中

半紙功名滿地愁都教白了少年頭  
早應未拜曹參相終不當封李廣侯  
曲水亂山紅樹晚西風殘照白雲秋  
歸鴉一片投林去自笑勞生未解休

丁未始還邢臺三首

十年朔漠到鄉城里巷傳聞喜復驚  
老者相看更相會小童爭拜又爭迎  
忘懷不講世俗禮無外始知鄉黨情  
向日垂髫皆冠帶旋通小字始知名

布袍抖擻客途塵閭里歸來感慨頻  
一代衣冠風又變  
千年城郭物還新  
黃耆總作墓中鬼  
街巷半居鄉外人  
精舍東邊存舊宅  
眼前渾不識比隣

清明左側上歸鞍  
急到邢臺六月間  
萬里春風吹綠鬢  
一城和氣煖朱顏  
昔年林下閒為貴  
今日鄉中貴是閒  
布衲藍衫人調笑  
如何不著錦衣還

新春有懷

笛聲吹落小溪梅  
寅位還看斗建迴  
蟄物得春當出地

阿香貪睡不推雷百年囊裏詩千首萬事花前酒一杯  
別後故園桃李樹他年寧肯重栽培

春日園中

人生難預定行藏且著閒吟寄醉鄉還有江湖供酒杓  
豈無珠玉入詩囊春風花發蜂兒鬧細雨泥融燕子忙  
一架酴蘼開較晚海棠雖好惜無香

春日寄友二首

東風吹夢入家頻夢覺來時總不真處士固知為贅物

還山終欲作閒人  
漁樵有話同誰說  
花柳無情各自春  
一曲高歌一杯酒  
江邊醒客莫相嗔


暖過新春料峭寒  
寒鴉欲逐曉風還  
萬千世事回頭後  
四十流年倒指間  
白酒有時長可醉  
青山無處不堪閒  
功名到底誰能了  
贏得勞生鬢早班

正月十三日得鄉官書

浮雲流水不相依  
時止時行各自知  
萬事至天無不樂  
一心於道有何疑  
溪邊楊柳飛花早  
海外蟠桃結子遲



一樹甘棠方破萼東風應著好風吹



藏春集卷二

# 欽定四庫全書

集部

藏春集卷三

四

詳校官中書

臣孫溶

主事

臣

呂雲棟覆勘

總校官編修

臣

王燕緒

校對官主事

臣

陳文樞

謄錄監生

臣

施華

欽定四庫全書

藏春集卷三

元 劉秉忠 撰

七言律詩

二月寄鄉友

漠北燕南幾日程  
鴈來人去總飄零  
春陰將散好風至  
野燒漸空芳草生  
橋下洄深鴛水綠  
城頭突兀鵲山青  
此情擬託新詩遣  
寫就新詩轉繫情

春日遣懷

蓋世功名一局棋千年城郭昔人非  
分開春色花休妬  
流盡年光水不知  
詩酒可娛惟自得  
林泉雖好幾人歸  
長繩不繫天邊日  
寄與東風且慢吹

春晴曉望

水漲池塘雨洗塵  
際空樓閣倚闌人  
星潛月落千山曉  
日暖風和萬物春  
何樹落花飄蕩遠  
誰家飛燕往來頻  
眼前盡是無聲句  
卻恐詩人道不真

閒中

成物心存一寸丹行年半百鬢毛班  
鵠鴻眷眷期同列  
猿鶴颺颺怪未還  
懶性從來倦馳逐  
坦懷元不厭蕭閒  
平生遊世東方朔  
金馬門中是隱仙

溪亭小飲

亭前桃李水邊樓與客攜壺慰倦遊  
眼底誰知花嫵媚  
人間惟有酒風流  
情元易感千生在  
愁不難消一醉休  
傳與京華年美少  
莫將白髮博封侯

秋晚

秋晚梧桐翠已殘  
松風竹雨正珊珊  
功名果是將人誤  
懷抱惟除著酒寬  
一枕清風醒後覺  
滿軒明月卧中看  
乾坤裏許元無事  
閒殺東山舊謝安

寄友

歸心搖蕩菊花期  
濁酒留連奈別離  
方外半生人事略  
天邊九月鴈書遲  
昨非今是翻然覺  
坎止流行斷不疑  
卻恠青春無柱杖  
滿頭白髮儘相欺

答隘客

坎蛙自蔽無餘地  
海若汪洋納百川  
士子行藏須達節  
人生貴賤定由天  
翰林自不拘吟放  
御史誰曾管醉顛  
萬事轉頭都是夢  
枉教愁擾轉頭前

答鄉友

人生終老覓菟裘  
白髮行藏獨倚樓  
南鴈縱能傳尺素  
西風不解送扁舟  
蒼山老樹烟波晚  
零雨疎松水墨秋  
願偃旌旗舞干羽  
功名輸與玉關侯



倚樓

倚樓雨霽暑風涼滿眼西山晚翠長書傳紛紛自今古  
漢唐亶亶有興亡一時王謝訐方畧萬世伊周合廟堂  
致主澤民非我輩任人疑怪水雲鄉

花時客至

翠染新成楊柳絲紅粧爭簇海棠枝官身縱酒惟閒日  
老眼看花勝少時好客一來深有幸曲厄滿勸不須辭  
晴明壯健相逢處莫負唐人七字詩

歲暮遣懷

白首何從望省郎青春無伴共還鄉  
采薇縱廣饑終疾食肉非多智豈長  
半夜談天人寂寂明朝涉世事茫茫  
雪消咫尺春來到擬對芳華醉幾場

慶王承旨慎獨八帙之壽

白玉碑中第一人黃金殿下老朝臣  
富公同享八旬壽

闕





袖垂扶又倒家人轟笑醉歸來

南北春秋鴈往來一年懷抱幾番開風雲氣在元飄逸  
錦繡詩成不剪裁飲但飲人非飲酒憐須憐德亦憐才  
自因量窄常先醉慚愧君家大盞臺

遣懷寄顏仲復二首

名利場中名利兒寸心徒用惡尋思人才自有安排處  
物理寧無否泰時縱量傾殘一壺酒暢情吟殺七言詩  
詩成酒醉東風晚月照梨花第一枝

朱顏白髮任流年  
睥睨揶揄置兩邊  
皆醉皆醒人宜爾  
一鳴一息物當然  
飛騰起處須從地  
智力窮時便到天  
惟有無生話無盡  
何如緘口坐癡禪

寓桓州

百年行止料皆難  
今是昨非豹一斑  
辜負夙心泉石畔  
纍垂短髮縉紳間  
夢回枕上聞歸鴈  
雨霽城中見遠山  
三徑就荒松菊在  
人生底事不能閒

思歸

溪山幽境老情懷閒著漁磯與嘯臺陶穀果然無相分  
翰林都道有仙才塵容俗狀今如此綠鬢朱顏安在哉  
會向桃源訪消息雲迷洞口沒人來

山居曉起

禪客生涯貴寂寥幸居山寺遠塵囂情難斷處千年在  
心肯閒來萬事消新月看殘還舊月今朝過了任明朝  
須知元氣常流轉平旦無風自海潮

晚遊

山水清佳自在遊  
利名莫莫復休休  
瘦筇此日真忘世  
長笛何人效倚樓  
鴉落點成千樹墨  
鴈飛橫絕一天秋  
歸來小院松梢上  
新月低斜玉一鉤

歸來

昨非今是海漫漫  
蜀道容吾曳杖還  
數友偶成詩酒會  
一年不入縉紳班  
風吹柳葉先舒皺  
春窘桃花亦破磴  
但得樽前開口笑  
未為辜負此生閒

樓上



睡起重持金曲卮要憑芳酒緩離思醉魂屢作還山夢  
吟興多因寄友詩千里波光風定後一樓山色雨晴時  
碧雲望斷佳人遠投樹棲鴉已滿枝

春暮有感

殘花離樹酒盈卮但願春歸熟醉時楊柳隨風飄翡翠  
海棠和雨滴胭脂半生不定猶飛梗諸事無能強賦詩  
昨日溪邊閒倚杖水明如鏡鬢如絲

睡起

連歲驅馳萬里程  
碧臺歌舞笑爭名  
山中猿鶴丹心在  
塞上風烟白髮生  
對客倦談當世事  
向人難悉未歸情  
雪花亂打西窗急  
總似芭蕉夜雨聲

捲簾

烟籠碧草繞迴溪  
水向東流日向西  
鴉隊落來和樹黑  
鴈行橫處與雲齊  
杯中有物甜如蜜  
心上無愁醉似泥  
蝸舍睡醒簾半捲  
遠山相擁翠環低

遣懷

世事茫茫今古同  
人生無奈落西東  
幾年羈旅鴈聲裏  
千里家鄉蝶夢中  
梧葉打殘秋夜雨  
菊花開盡曉晴風  
淵明醉卧東籬下  
不管明朝酒盞空

銀河

一道銀河萬里橫  
遙看似接鳳凰城  
晴波不受微雲點  
夜色還隨皓月明  
七夕橋成牛女會  
九秋霜降浪濤平  
歸途試問乘槎客  
卻到人間有幾程

大理途中寄竇侍講先生二首

昔聞名德仰高山近識高賢未敢攀富貴不求驚見擢  
田園成趣喜歸閒一心止水常平湛萬事浮雲任往還  
解把陽和涵養就不言春色滿人間

元氣勻將造化施自然閒雅貴天資只言世上無黃石  
誰信人間有紫芝一見頓忘名利志劇談渾沒是非辭  
別來萬里知安否時復臨風有所思

重看江上梅花

萬里縱橫戈戟中歲云暮矣遇芳叢江邊疎影斜斜月

天外幽香細細風初見一枝珠琲璫再看滿樹雪玲瓏  
無才不得西湖句空對冰容駐玉驄

寄張平章仲一

春光滿眼酒盈樽難得同觀易見分秋氣著人涼似水  
晚山和我淡如雲清歌月影簷頭轉殘夢鐘聲枕上聞  
玄鳥欲歸黃鳥斷詩哦伐木正思君

野園會飲

都城不得縱蹉跎樂事還於僻處多酒裏薰陶成受用

宵中塊壘自消磨樹頭鳴鳥關關好花底春風淡淡和  
一卧醉鄉如洞府人間日月任飛梭

暮春樓上

松風竹雨夜珊珊睡起樓頭怯曉寒手裏酒杯隨接飲  
眼前書冊懶拈看綠稠樹葉迷蝴蝶紅盡花枝放牡丹  
欲覓春歸無處問滿城飛絮凭欄干

漫成

上苑風光爛漫遊紫蘭黃菊各春秋一心不逐榮枯變

萬事寧為得失憂充塞乾坤惟道在博通今古有書求  
慣曾澤畔翱翔雉莫謂楚籠不自由

小飲

清歡媚景好光陰自古猶難況在今坐下人多年漸老  
樽中酒滿興偏深將歌雪曲先傾耳疊泛霞杯足快心  
百歲奔忙緣底事且拚一醉謝浮沈

別友

鸞鳳棲梧枳棘空車行步路有窮通九秋霜落樹無綠

三月日迴花自紅物態莫驚時冷煖人生還恨限西東  
一杯酒盡陽關曲萬疊雲山入望中

寄友弟

一別陽關金曲卮深秋節物動離思蝶飛籬畔菊開後  
鴈滿江頭楓落時才大難為鸚鵡賦情親易感鵲鴿詩  
願將村老真誠語寄謝悠悠世上兒

思友人

亂點蒼山壯地形西風白草動秋聲幾條野水馬爭飲



一帶荒田人不耕  
蝸舍鴈程隨處客  
龍岡鴛水故園情  
關河月底人千里  
一夜相思白髮生

田家

衡門晝掩絕蕭騷  
麤糲充腸體布袍  
許汜壠頭甘自若  
陳登樓上對誰豪  
有田何必懸金印  
無犢還須賣寶刀  
青帝布恩先畎畝  
穀生如草雨如膏

漁父

撥棹垂竿日日同  
藕花叢了荻花叢  
朝雲暮雨閒身外

春水秋山醉眼中  
十里烟波明落日  
數聲漁笛響西風  
紅塵不到孤舟上  
誰得江湖伴此翁

回杖

遠山橫掃翠眉低  
春事闌情鶯更啼  
策杖欲尋佳境去  
出門還被亂雲迷  
野花野草同三月  
閒鶯閒鷗共一溪  
沽酒歸來北窻下  
人間如夢醉如泥

贈棲雲王真人

壺內光風境界寬  
骨青髓綠發朱顏  
三生勘破人間夢

九轉燒成日裏丹鶴馭不知天地闊鳳書還許水雲閒  
隨緣應世元無事一片靈臺處處安

再觀木庵書

書法都歸篆意圓木庵別有筆中天一家楷式由來妙  
半世功名非偶然我欲窮源蒼頡上誰能得趣魯公前  
鰲山成道寧無日更為挑燈續斷篇

臨蒼頡書

落魄心情與世疎人皆知癖不知愚平生專究伏羲易

漸老又臨蒼頡書但願自宗為法度不辭人笑費功夫  
他年變盡龍蛇體更看飛雲滿太虛

重九後作

地雄西北帝王州一月登高未即休紅葉黃花空應節  
蒼山白草不勝酬寒風無意頻吹面破帽多情卻戀頭  
恰遇鄉人來送酒淵明不醉復何愁

聞鴈

織錦文章學不成更看斷句覓詩名黃花陟覺泣愁思

白酒良能解宿醒月裏關河家正遠樓頭鼓角夢初驚  
尺書寫下還慵寄初動風前有鴈聲

過并州

山川滿目翠成圍流水悠悠鴈北飛一枕黃粱新夢斷  
千年華表昔人非烟霞有路迷芳草桃李無言對落暉  
明日征鞍泊何處春光雖好亦思歸

自澤州過懷衛

漫澤南來過二州太行背腹得兼游陷泥蹶馬十朝雨

落葉粘人九月秋白日悠悠又西轉黃河滾滾只東流  
山林水竹行程裏是處都堪畫扇頭

對酒

秋水澄澄照影孤百年逆旅轉蓬廬聊生莫問鳩為計  
憶遠須憑鴈寄書北海鯨魚鈎已重中州麟鳳網猶疎  
清愁萬丈干雲月著酒澆來自破除

贈豪城董萬戶

老帥曾酬報國心遺君兄弟茂如林荆花一院長生色

棠樹千年勿剪陰私物應官於已薄家童代役感民深  
更能設藥除羣病四境誰非播德音

感事

萬物芒芒體一如只爭秉賦有精粗若非禮義人誰教  
又是詩書我更愚蜂虿亦能摧猛士廟堂安敢悔樵漁  
愚夫愚婦予能勝料必賢明見是圖

贈完顏伯誠甫

仲德之子也

春風秋月透孤房恨殺關雎窈窕娘枯木岩前空積思

散花天上不聞香  
生民世系來千古  
相國人家只一郎  
安可斷流同潦水  
合隨江漢入汪洋

對菊

啼殺前村樓後鴉  
黑頭江總早還家  
荆山玉定難同石  
麗水金元不在沙  
誰有才猷資國用  
自無勲業向人誇  
滿城風雨重陽近  
搖蕩歸心對菊花

對月

鶴髮貂裘映月波  
兔疑蟾戀竟如何  
絕知詩老丹心苦



未信書生白眼多半夜香風飄桂子九秋寒色帶姮娥  
無人共竭樽中醪獨酌清光送浩歌

新春城外

青山懷抱古城隈楊柳梢黃海鴈回詩思不高無好句  
酒腸雖窄有餘杯嶺頭寒盛雲猶雪爐內香消火已灰  
為問名園起花手可將桃李強栽培

過豐州二首

平生清興在林泉世路誰教也著鞭馬上青山長萬里

鏡中華髮已三年又經黑水還沙漠才自烏雲出瘴烟  
蓋世功名正低首西風秋樹一聲蟬

邊山瀰瀰水西流夾路離離禾黍稠出塞入塞動千里  
去年今年經兩秋晴空高顯寺中塔曉日半明城上樓  
車馬駢闐塵不斷吟鞭斜裊過豐州

雲內道中

遠水平蕪間野花寒雲淡淡際寒沙閒禽向晚無投樹  
遠客逢秋空念家萬里經年走風雨一身無計卧烟霞

來朝又上居延道懷古思鄉改鬢華

過東勝

秋山漠漠晚烟橫牢落關河鴈一聲鐘鼎無媒希望斷  
江湖有志利名輕皇天不弔衣冠絕神物還從臭腐生  
慘淡風雲會銀夏短衣匹馬過邊城

過鹽州

山川紆曲際遐荒萬國華夷入混茫草木不生枯燥地  
風雲長慘戰爭場雨餘千嶂添秋色塵定孤城下夕陽

感慨征人太辛苦東山詩就鬢毛蒼

四月望日途中大風

慘淡乾坤震鼓鼙飛沙轉石捲雲霓山川道路俱難辨  
南北東西一向迷聲浩浩時霾雨落色蒼蒼處玉蟾低  
四更力少猶吹蕩催上征鞍驟馬蹄

過天井關

雲冷風高天井關太行嶺上看河灣九州占絕中原地  
一壑攔迴左界山王霸分爭圖未捲英雄鏖戰血猶殷

華陽春草年年綠  
汙馬南來不放閒

關外感秋二首

白露為霜陰始凝  
挽迴春律果誰能  
只宜緘口人間事  
未解含情客裏僧  
黑水浪濤方括括  
南山氣象愈稜稜  
草枯葉脫西風勁  
正看掀飛掣臂鷹

一岩幽隱幾時還  
猿鶴蕭條蕙帳閒  
畫餅功名誰得飽  
浮雲富貴此堪攀  
歸禽側畔千章木  
行客前頭萬疊山  
不道世人無定分  
本圖何事鬢毛斑

宜陽道中

一架飛梁映霽虹，玉流通灌稻畦中。  
烟雲忽鎖山川好，城郭新脩市井空。  
遶樹深深人出沒，長空淡淡鳥西東。  
季鷹不憶蓴鱸美，萬里秋風又轉蓬。

龍德城上

風還攏麥掉青旗，烟歛人家住翠微。  
綠水歌殘山落落，碧雲望斷樹依依。  
一封鄉里書才到，三月天涯客未歸。  
燕子銜將春色去，遊蜂空趁落花飛。

六盤會仲一飲

青雲自笑誤歸期回首關山滿別離  
禮樂詩書君負苦  
東西南北我成癡  
碧梧一葉秋風起  
銀竹千林春雨垂  
塞下相逢一杯酒  
貴傾肝膽畧無疑

宿河西沙陀

黃雲山外接黃埃  
歸路漫漫沒草萊  
馬上彎弧皆尚勇  
機頭織錦孰憐才  
星珠千顆撒銀漢  
月鏡半圓橫玉臺  
寂寞沙陀逢七夕  
西風瀟瑟夢中來

春興

花滿樽前酒滿卮春風桃李噴開時醉中忘卻三春夢  
醒後吟成七字詩大地豈無騏驎路高梧元有鳳凰枝  
閒人不為功名鄙幽事相關未暇思

關

樹鎖蒼烟白鳥鳴春風花滿鳳凰城無才難料人間事  
有酒何求紙上名分別是非誰得正摩娑今古自宜平  
閒愁枉壓眉頭重且放襟懷伴麴生



青樓歌舞碧城春  
王謝風流日鬪新  
落下殘花猶殢客  
墻間餘酒也狂人  
無田易佩蘇秦印  
有扇難遮庾亮塵  
白晝錦衣多睥睨  
一鄧何處不安貧

三冬蟄物聽雷驚  
二月餘寒尚旅亭  
春色未歸桃李樹  
劍光空射斗牛星  
待船客子思同濟  
沽酒人家寃獨醒  
一曲滄浪洗烟雨  
汨羅江上楚山青

東君號令忽傳新  
一點陽和處處勻  
白玉花殘梅過臘  
黃金條嫩柳回春  
鴈離湘浦獨淹客  
鶯囀皇州已可人

睡殺海棠吹不醒  
風前桃李看精神

藏春集卷三